

乾嘉詩文名家叢刊

張寅彭 ● 主編



張寅彭 主編
劉青山 點校

法式善詩文集

下

人民文學出版社




人民文學出版社



乾嘉詩文名家叢刊

張寅彭 ● 主編



張寅彭 主編
劉青山 點校

法式善詩文集

下



存素堂詩初集錄存卷二十三

乙丑

季壽以李太守尺五莊圖索詩用季壽卷中和東坡送劉道原韻

荷花往日如人長，竹廊西去無殘陽。兩城之隔廿餘里，到此未免尋詩忙。今春客約看芍藥，繁華過眼嗟存亡。樓臺傾圯老松在，百尺猶堪誇倔強。暫時笑樂取適意，階花紅映櫻桃湯。十年日月送瀟灑，兩鬢黯澹餘秋霜。振衣每作出塵想，放筆無復題襟狂。良朋零落半天下，旗鼓往往逢當場。陶君江漢射雕手，囊鞬相見心徬徨。逸韻鏗鏘寫歸思，才人不遇徒悲傷。太守巖居養風翮，九萬里路將翱翔。西粵疆域古奇險，大川綿亘山莽蒼。行空漫跨遼陽鶴，讀書學牧金華羊。笑我婆娑綠陰底，聽鐘長日棲雲堂。

曉行盧溝柬蘭雪

彳亍盧溝橋，殘月松梢掛。五字摩詰詩，一幅叔明畫。水暗星忽動，雲遲路轉隘。長嘯沙雁飛，早行山鳥怪。寺磬沉遠村，林葉紅半砦。馬上句重續，籬下酒初曬。陶公未可希，勉學西江派。

次蘭雪博士用東坡微雪南溪小酌韻同煦齋侍郎

殘年大有飄零感，準備圍爐借酒消。枕上遠鐘方破夢，溪頭新雪已平橋。寒衾雲濕增鄉思，深館風微遠市囂。怪底巡檐不招我，梅花香只兩三條。

再用前韻寄蘭雪

君別匡廬又三載，新愁拚向故人消。花明城北前朝寺，雪漫溪南小石橋。閱歷漸深書有味，性情能靜室無囂。數峰青間數峰白，凍柳昏煙幾萬條。

題畫山水

入山喜聽流泉聲，溪畔坐數山花明。昨往翠微值秋雨，黃葉滿地無人行。吳生蘭雪自恃腰腳健，攀盡風梢與霜蔓。羨他逐鳥梯高雲，笑我隨僧噉香飯。歸來滿胸貯山色，畫手何人能寫得。有客示我山水圖，山水之外餘筆墨。嶽嶽者石林林松，千巖萬壑秋芙蓉。谷口有花殘陽紅，嶺背築屋舟不通。樵夫牧豎虛無蹤，只許老鶴褰褳從。飲酒一吸三百鍾，振衣直上千仞峰。石庵滴綠如江篷，延佇又恐來蛟龍，涼月送客歸牆東。

題煦齋侍郎紀夢篇即書夢禪畫卷後

玉堂眷屬皆神仙，出夢入夢非偶然。夢禪寫夢意有託，尚書戴公題句如參禪。天上金書誰辨識，身世恍置紫微側。七星的皦明霄東，一字扶搖照斗北。隔水微聞戛擊聲，橫空盡作金銀色。白雲飛處石橋阻，春風一陣花如雨。殿閣深沉路杳冥，仙子趨躑寂無語。天道微茫不可知，人情變幻何足數。侍郎自是星精淪，濡染大筆排天門。閨中琴瑟日和樂，世上伉儷徒紛紜。老人七十坐無事，冰雪滿頭弄煙翠。畫出迷離惆悵情，請從筆墨看游戲。

題毛周花卉冊

南田筆法今誰繼，剩有春波王霖與素人朱本。我愛夢禪老居士，胸中別具十分春。是冊為夢禪所賞。
忍將筆墨慰饑寒，為買秋菰畫牡丹。休說鉛華刪未盡，世間幾個冷人看。

再題紀夢篇書卷後

君非東方生，又非青田子。瑰詞寫荒誕，灑灑盡數紙。洞口桃全開，掩映樓臺紫。萬物如浮泡，一心比止水。雲亂山益奇，月明花更美。銀漢富波瀾，鈞樂辨宮徵。可解不可解，上帝默驅使。我謂悠忽語，李白夙最喜。夢禪工寫夢，而又喻禪理。為君證佐之，超哉蒙莊旨。

送楊雪帆懋恬觀察之任蕪湖

吾師德文莊，當日官漕帥。舊章率由之，楊公所心醉。文勤彭習掌故，公政述詳備。後讀勤懋集，詩筆醇而肆。冲微靖節遺，兀岸山谷嗣。寒燈燼十年，未獲窺奧義。觀察公哲孫，橐筆職清秘。皖江水潏潏，蕪湖關鬼歸。祥和氣濡染，草木亦蒼翠。至今吳越民，猶說先公治。使君旌旆來，將無乃

祖似？

先月樓歌應雲悅道人命

登樓看月秋滿湖，秋水橫天月有無。樓中來往神仙徒，濕翠溟濛松栝亂。銀蟾瀉影朱檐半，人間煙暝蒹葭岸。樓上讀書樓下酒，風露之外餘星斗。眼前誰是搜天手，三千瑤島吾遍游。茲樓恨不居上頭，天風容易迴扁舟。烏鵲南飛蛩自語，玉簫聲隔梅花渚。孤鶴低頭恨無侶，今秋結伴翠微行。吳生蘭雪坐愛山泉清，危石飛上猿猱驚。我疑生也挾修翎，豈知嗜奇性命輕。茅庵臥待明月昇，放眼無限蒼茫情。回頭忽睹匡廬青，西園樓比西山亭。西園月較西山明，放筆試作西園銘。時邀蘭雪題冊。

即席應雲悅道人教

欲到先月樓，我比月尤亟。自分隔霄漢，未易瞻顏色。豈知甫握手，轉若舊相識。爛爛碧玉箋，許我灑敗墨。梅花白石間，風雪任捫陟。一語偶投契，肺腑期銘刻。但比號寒蟲，秋階暗蛸蛸。青山容易買，白髮難再黑。

仇十洲湖亭消暑圖歌

畫卷橫不滿一丈，六月薰風紙邊漾。江南只有仇十洲，筆所未到神先王。湖亭四面皆荷花，萬荷花缺處漁人家。朝朝暮暮無住著，一船飄泊斜陽斜。十頃花光百壺酒，好句爭出詩人手。狂吟驚散沙汀鷗，晚涼瀉入石塘柳。今年避暑淨業湖，菱芡堆盤招酒徒。鮭菜亭空苔蘚漬，藜光橋圯田園蕪。蓮花博士吳蘭雪，世上好官都不屑。殘衫破帽坐月明，長嘯一聲蒼厓裂。我亦時上打魚舟，簑衣箬笠吾同儔。欲倩畫工寫此意，畫工只寫臺與樓。展對茲卷三太息，淮海風光喜初識。愿執秃筆列座隅，刻畫長江萬里色。人生但合辭塵囂，水可釣兮山可樵。心中無暑到處好，老夫惆悵湖亭遙。

寄黃心庵

櫺山有草堂，不識何年筑。黃髯年五十，掃逕種松菊。愛詩如性命，求友遍川麓。我雖講習久，萬卷何曾讀。輒煩搜剩句，雕鏤上簡牘。聞君空山中，守身如守玉。雖耽湖海閑，豈不民物屬。東南我朋舊，大半建旗纛。果有濟時策，曷弗慮心腹？空言似無補，旁觀勝當局。但希杜甫狂，莫效唐衢哭。霜雪半頭白，煙水一竿綠。靠山多種梅，近水全栽竹。好趁木蘭舟，去噉胡麻粥。

先月樓和韻

牆陰騎馬愧登仙，苑柳宮花屢佇延。余三為學士，兩掌宮坊，一掌宮局，其地距樓皆近。每宿玉堂行月底，只疑朱閣矗雲邊。雪晴泛酒人歸晚，松靜哦詩鶴聽偏。多少林鴉棲暝色，一蟾涼吐翠微先。

送董午橋榮緯

慈仁寺裏五年前，妙墨狂文遠近傳。五年前君為余代書《佛像記》。賣字洛陽秋滿紙，尋詩城北雪漫天。青山載酒人爭羨，白髮簪花世共憐。此去江湖誇我健，旗亭畫壁有新篇。

臘八日葉琴柯招飲留宿齋中剪燭賦此

交情篤兩世，譜誼敦卅年。驄馬鳴柴門，冰雪時漫天。寒雲凍三尺，香粥流初筵。自問非酒徒，玉板參詩禪。繁華閱漸深，冷澹持彌堅。甕蠹與園韭，錯雜春盤鮮。晚郭斜陽斜，高樹顛風顛。燭早西窗燒，榻已南榮懸。萬頃明月色，一屋梅花煙。誰謂斗室隘，不及秋嶽巔。

倪米樓自南中以吳南薌畫乞詩郭頻伽已先著墨

作此奉懷兼寄南薌頻伽

米樓別十載，聞學益精進。每際槐花黃，高情勞遠訊。灑然絕萬物，抱琴甘飢饉。風濤豈不險，日月何其迅。忠信所可恃，百年等一瞬。草木與春永，頑石入山峻。白雲舒捲心，剪燭畫中認。

南薌在濟南，為我圖秋園。秋氣生十指，澹妙倪黃論。睹茲雲木煙，如行苧蘿村。寥疾琴聲微，飄忽江濤喧。豈君胸膈中，別有經畫存？抑或下筆時，吸盡千酒樽？掛我梅花廬，綠寒不可捫。

頻伽寄詩至，卻在六月初。其時荷塘風，吹雨涼我廬。展吟字字清，吟罷還躊躇。挾此涉湖海，何故長齟齬？憂患志士多，禮節才人疏。且買五畝田，趁月梅花鋤。守門語孤鶴，入市煩蹇驢。招邀元鎮流，結伴為樵漁。

畫鶴

琴館簫臺愿不違，何心更向九皋飛。老來野性消磨盡，日守梅花傍釣磯。

臧孝子和貴詩

嶽嶽愛日居，淵淵拜經堂。髫歲依阿兄，校字浙水旁。阮公人倫鑒，纂詁推二臧。無何芙蓉城，召子司文章。徒以母兄在，重為死者傷。大節苟無虧，顏子非云殤。冗間長樂老，百歲寧足慶？上帝計壽夭，不從枝葉量。三十年命短，千百年心長。勿炫朝露華，揮涕悲斜陽。

答喻東白宗崙

雨濕秋燈昏，愁來不可遣。淨湖倡和詩，煩君訂訛舛。乃為錯雜書，砭砭混鏐銑。好學弗遺近，從長肯匿善？月涼照欹斜，雲動共舒捲。自落吳生手，寶之如訓典。昨啓東平緘，徵引到拙蹇。蘭亭第二本，世猶奉冠冕。比玉當有珎，如肉分一臠。瘦影共梅花，墨香凍春蘚。

瑤華道人以盆梅侑畫見貽畫亦梅花也感其意賦詩

我身近來如梅瘦，我詩近來有梅臭。道人知我愛梅花，瓦盆紙卷紛橫斜。天寒斜日幽村遠，澹墨新詩氣深穩。梅雖老矣花仍鮮，茅屋頃刻生孤煙。守門老鶴悄無語，夜深只有涼蟾侶。

蓮花博士歌有序

陸放翁夢一故人曰：「我為蓮花博士，鏡湖新置官也，子能暫為之乎。月給千壺酒，亦不惡也。」蘭雪今官博士，性喜蓮。今年夏游淨業湖看花，得詩最多。楊蓉裳為作蓮花博士歌，黃左田補圖。

月千壺酒良不惡，自有此官無此樂。蓮花博士陸放翁，散髮江湖秋夢薄。放翁當日憂心多，車塵爭奈仙人何。蝴蝶莊周喻言耳，放筆且作蓮花歌。五百年後東鄉吳，淨湖看月思鏡湖。一官到手總夷宕，橋門醉倒諸生扶。才叔長篇左田畫，借歸都向詩龕掛。花影搖將鮭菜亭，書聲聽到成均廡。四門三舍吾游遍，石鼓摩挲秋雨院。月橋舊是酒人場，槐市今誇詩筆健。博士前身即放翁，人間天上清樽同。西涯六月蓮花紅，家家畫汝為屏風。我自手種龕前松，故人勸我騎蒼龍。

丙寅

元日過積水潭

年年騎馬踏京塵，誰識風潭自有春。岸雪消融溪水活，我來又作看花人。

初春即事

老豈遂忘世，病猶耽讀書。百年過一半，千載究何如？
雪擁松根睡，風催柳色舒。向陽溪水活，人饌有鮮魚。

居閑

居閑非就懶，能睡始忘貧。筆下漸無色，胸中時有春。
溪橋隨意足，花柳入年新。何必江南路，家有釣綸。

春來

春來能幾日，凍樹盡啼鴉。坐石憐苔色，逢僧問杏花。
山風吹雨過，林月上樓斜。我欲松堂宿，清宵鬥筍茶。

春曉行海甸道中

行到水窮處，萬峰猶在西。湖風上衣綠，沙月向人低。病退還騎馬，年衰怕聽雞。一聲雲裏磬，催我度寒溪。

贈陳晴崖

我愛晴崖子，一生耽苦吟。奇書分日讀，春館閉門深。夢裏黃河遠，詩邊白髮侵。可憐韓吏部，容易孟郊尋。

正月十七日陶季壽以余生日邀同秦小峴謝鄉泉楊蓉裳

吳蘭雪陳石士集趙象庵蔗山園看梅季壽有詩次韻

晨起僮僕走相賀，湖上春風吹綠破。老梅著花三兩枝，好友圍爐六七個。蔗山園即鷗波亭，笑我豈堪荷鋤佐。入門先有鶴來迎，騎馬回看月初墮。宿醺新生草木香，筆禿舊屬文章貨。日長漸覺書味永，屋小不愁花氣大。歌成全付玉琴彈，酒醒屢傍水仙坐。庭燭光搖留客宿，園蔬翠剪催奴課。四海

兄弟良獨難，五十年華嘆虛過。杏花開未問山僧，屈指雲堂再賡和。

戲柬吳蘭雪再疊前韻時蘭雪留宿敝齋促其校同人詩集

買得奇書歸自賀，老屋一燈紙窗破。山裏殘梅剩幾枝，海內才人推若個。選樓終當讓君主，屈宋何妨暫曹佐。西廂日昃棠陰移，橋門風定槐花墮。禮法要為我輩設，君近辦琉球學事。文章原是君家貨。字繁目奪燭光短，樓近夢攪鐘聲大。酒醒看雲溪上行，月明選石松邊坐。倪迂茶半桐樹洗，林叟吟罷梅花課。淨業湖頭六月時，萬荷風裏騎驢過。楊柳灣西屋數椽，移居詩定從頭和。時蘭雪欲借居西涯。

鄰人失火翌日蘭雪過問因訂游淨業湖三疊前韻

眾人皆弔君獨賀，垣衣屋瓦參差破。門外風初損柳條，階前雪尚埋竹个。校書盡日松關掩，手腕欲脫誰相佐？吳生近日疲應官，槐市歸來日西墮。斜行淡墨君長計，斷字零縑我奇貨。睡裏誰和詩境寬，醉中不辨酒杯大。慈恩寺裏杏花開，細雨溟濛湖閣坐。邀將畫手寫寒雲，付與山僧了清課。月橋一帶朱樓多，騎馬人從樓下過。羨他雙燕語呢喃，湖上新篇煩爾和。

唐寅溪山亭子卷

撥墨未一斗，幻成千百峰。一峰一層雲，滴翠為幽淙。水流眾籟靜，雨過秋花紅。孤亭峙林表，萬綠生牆東。鶴鶴寂無語，聒耳惟杉松。晉昌有狂生，落筆如飛鴻。十笏桃花庵，頽敗斜陽中。詩思天際來，塵夢忽焉空。匪由手腕靈，全藉心神融。使之作文章，當不差遷雄。何乃雜酒徒，餓死蒿萊宮。至今明月高，猶響寒山鐘。

秦小峴太常約同人作東坡生日越月補以詩

奉常淮海裔，千載懷坡公。臘月公誕辰，君適來粵東。設祀拜像側，如在蘇門中。杭州與惠州，君兩修公宮。配之以淮海，孝思何雍雍。今典奉常儀，厥制抗秩宗。朋儕聚三五，說禮相從容。梅花薦一枝，水白斜陽紅。吹簫奏短曲，聲逐靈旂風。誰謂公生平，未一游居庸？公神在天地，北地南天同。

題韓桂舲方伯還讀齋集後

堅白貴自凜，磨涅非所知。言者心之聲，難得言無欺。字字出肺肝，一字一淚垂。側聞江漢間，黎

庶多瘡痍。藥石豈未投，所恨無良醫。君既燭隱微，當早為措施。莫僅託空言，使人抱渴飢。緬想還讀齋，短几南榮支。蘇公與杜公，顛倒夢見之。咀吮到骨髓，匪襲毛與皮。臨穎沉痛語，長沙危苦詞。直扶生平懷，告爾百有司。孰於州縣堂，大字鐫諸碑。

贈傅醫

長安無業兒，每藉醫為活。《本草》尚未讀，人命焉能奪？高車與大馬，聲勢相薦撥。傳君來廬山，對此心惻怛。生平九折肱，家傳有衣鉢。微茫肺臟辨，俄頃瘡痍割。胡乃欲為官，迫切求釋褐？我今三十年，儒衣尚未脫。良醫比良相，勿致群言聒。

秦小峴招同謝薌泉楊蓉裳蔡式齋陳石士陶季壽集崇效寺看花次韻

忽雨忽風寒食天，太常洗盞磬房前。雲沉水檻生花氣，飯熟山廚帶石煙。一角斜陽隱雅背，半瓶殘酒掛驢肩。明宵蒼雪庵中去，看月煩僧借釣船。明日有玉泉山之游。